

千頃齋初集

千頃齋初集卷之二十四

汝南黃居中明立父著

文部

行狀

明柱國光祿大夫少保兼太子太保兵
部尚書兼都察院右都御史經略陝
西四鎮宣大山西邊務 召還戎政
予告贈太保範溪鄭公暨元配 誥
贈一品夫人陳氏行狀

代

少保安肅鄭公之請老也實在萬曆壬辰云章
二十五上 天子溫旨慰留最後不得已乃許
休沐賜金幣錄蔭其子孫 詔吏部病痊日具
奏起用一時公卿大臣謂公甚壯武卽縣官有
緩急必召公既歸猶問公尚健飮否以爲國安
危鳴騶鶴書可旦夕下巖谷而至庚子蜡月公
卒嬰末疾捐館舍 天子聞而震悼爲輟朝
下宗伯太宰司空議祭九壇而加一遣官治葬
贈太保妻一品夫人陳氏並祭合葬諸所以榮

哀之典靡所不備至而公自其游宦二十六年
系官二十五任事三朝歷七鎮自侍郎至尚書
加柱國皆上特恩不由資俸銓補故事大臣
兼官兼兩而止而公以少保兼太子太保兵部
尚書兼右都御史經略兼總督三邊三兼矣賞
賚白金御史三兵備四巡撫六總督十六經略
三巡撫以後白金重以文綺飛魚二蟒衣五綵
段表裏十八襲皆異數也五臺塔院工成復蒙
慈聖皇太后賞銀三十兩紵絲三表裏人臣而

得賜於 皇太后又異數也協理京營時臥病
私第 上遣中使羊酒存問總督經略 陛辭
上賜路費金幣制虜有功 上三降 璽書褒
獎 上御經筵以孤卿侍文班首 上祀北郊
以京營官設帷幕戎服迎 法駕 上御思善
門以兵部侍郎召引 飛雲輦賜酒饌撤 御
膳遣二中使賜私第其爲 上所寵眷如此而
覃恩前後 勅命及其親 誥命都御史及其
祖一品及其曾祖任子三一錦衣指揮世襲可

謂挾震世之功極人臣之遇勲名閭閥始終無
間者矣於是公之子少叅君材等將以某月某
日奉公夫人合葬於賜塋之某兆而謀所以侈
國恩永先烈謹伐石以竢鉅公大人之銘若碑
而屬不佞某狀其事以備采惟某於公枌榆晚
進又愿公宇下國士之知斲斲方寸間非一日
矣卽微君請某固將效之其敢辭狀曰鄭之先
出滎陽鼎族自宋迄元家班姬山下之黑山村
其顯者曰節度使慶宣武將軍德鄰多偉略大

節爲德於里里人思而勒諸石紀奕葉世系然
缺有間矣其詳靡得而考云 明興繇黑山徙
遂城則自文政公始文政生通通生臻仕浙江
織染局大使臻生隆及陽陽第進士仕巡撫陝
西右副都御史隆生昱舉嘉靖辛卯鄉試贈柱
國太子太保兵部尚書則公父也自都御史公
貴業贈通公臻公如其官而寂後臻公隆公並
稱柱國太子太保兵部尚書則皆以公贈云贈
公娶於劉封太孺人累贈一品夫人始劉夫人

未舉子置側室孫氏復不宜子則子從兄之子
濱而久之劉夫人乃自有子是爲公公生秀穎
异凡兒六歲而贈公物劉夫人撫而教之八歲
授書過目輒成誦十歲能文任丘邊中丞試以
偶句曰少甘羅二歲僅能成文公應聲曰加孔
子數年卒以學易邊公大偉異之十八補郡弟
子員婁試輒高等食諸生旣以田四十畝讓其
兄濱濱辭謝曰是曩者所折爲吾弟奉母甘毳
也奈何予我卽予我不過分其半奈何盡予公

曰度第歲旣可當四十畝租入足供母矣卒讓之乙卯領順天薦邑大夫例派編戶錢米以贈公力辭曰士未拜官而先失守惡用舉矣沿習乃革里人至今誦義明年丙辰成進士觀比部政時選郎於公有世雅同年就選者必面謁公獨落落投一刺或謂公曰公選額宜大行當事者訝不相識且節推授矣公何恡一見乎公曰長者某固願見所以不私見者正欲成世父之公耳縱一謁可博美官所傷實多竟不往乃授

山東登州府推官登州地濱海自設官鮮除制
科無行取者必不行人而推官且海瀕則不一
謂之故也除目下公絕不色慍坦然之任執李
法不阿登州盜竊礦海道檄萊州捕無辜貧民
皆陷獄公白狀直指直指曰竢按萊鞠之公私
念是衆者安能枵腹緩旦夕死待命乎而會寧
海囚張某富而當大辟直指以屬公斃諸杖下
公召語之曰汝能輸粟活諸礦徒於直指下馬
之日乎宥汝扶死不者吾不能違直指意囚叩

首唯唯其後直指按萊惟罪元兇數輩株連百
許盡開釋而寧海囚亦自以其罪蔽法云昌邑
有夜殺娼門數命者其一賊曰吾萊陽孫華也
一老娼記而證之獄遂成而公故嘗道萊陽呼
保正孫華問民疾苦至是檢獄詞昌邑殺娼之
夜卽公問俗於華之日也公驚詫曰萊陽去昌
邑三百里是夜華方迎接官長能遠地殺人耶
華豈有兩身抑能翼而飛也亟白直指釋之諸
所平反多此類郡邑有疑獄數十年不能決必

以移公公出片語立定老吏無以易也辛酉選御史時分宜父子端擅而大理卿某刑部侍郎某文選郎中某者比周奧援如虎而喁莫敢撓侍御長安鄒公應龍彈去分宜父子三人勢始誦分宜且去上言臣去子戍固當第朝臣謂上崇玄居西苑及廷杖言官皆臣之故若然則論臣者未已臣無死所矣肅皇帝覽之心動諭內閣云嵩已退世蕃已重治更有言及者與應龍俱斬諭下舉朝失色其黨如三人

者皆彈冠而欲終鄒公事者復結舌矣公愀然曰此世道治亂之機也儻其黨與內援分宜再起天下事安可知遂抗疏劾三人不法狀疏入謁相國華亭徐公徐公曰君言誠正然獨不見聖諭耶且明日止封事卽下部覆須兩月彼錢神行君禍叵測矣公曰爲國去邪遑卹其它旦日諭旨下三人皆落職於是舉朝頌肅皇聖明而趙公之敢言分宜黨始解後侍御莆陽林公潤發其未盡之姦則公開之也癸亥京察

公資俸在諸臺後當事者越而委重糾大宗伯
以下十四人並黜免尋按四川攬轡入境卽以
柱后惠文彈治藩臬郡邑吏若而人墨吏望風
解綬去巡行郡國雖衣履所不及必躬涉其地
慮囚平法務在得情不拘拘成案壁山一讞釋
三百戍而木商某者以三殿工歲久礎盜公
爲請於朝所全活數千命甲子大試蜀棘以
得人稱乙丑連第者十二皆前茅士其後亦相
繼成進士過其仇云是歲土酋薛兆乾黃中爲

患公以計平之兼圖善後滇黔楚蜀之間安於
覆盂旣報 命稍遷四川叅議旋調分守郢中
郢故 肅皇湯沐邑中涓護衛 陵寢橫甚公
始至謁 陵中涓喝之曰 陵寢培土皆我輩
躬昇如使君不能我以鄉情私免之蓋中涓范
陽人故云公曰中使過矣 陵寢何地可言鄉
情然昇土非一人力我與中使共之趣從者扛
大畚來中使惶恐謝過公曰 陵土不親培自
中使始矣中涓色沮自是數以計術消其姦中

涓度無可柰何則爲蜚語中公公笑曰士君子
爲宦官謗便自人品增重禍福安足論哉後中
涓爲御史所糾公竟以法窮庀其罪郢人益安
肅皇念顯陵甚將勤工師勅少司空及司
禮近侍往督之天遣一出所在釋騷又歲苦
陽侯人懇不支公爲章程豫請於部使者其畧
曰舊邸雖在承天然主上以四海爲家修
理之費不當取之一省諸官供億不當責之一
郡當以天下之財力助大工以全省之財力佐

供億工作當從僱募不可議編派供億當從官
辦不可累里甲要使公私兩便上下相安而已
部使者深然之役興而民不擾丁卯擢澤潞治
兵副使澤潞遭虜蹂躪郡邑皆嚴城守小民困
踐更不得佃作公至悉罷登陴諸隸曰吾不自
爲虜也第檄諸賊曹修防禦令家人子盡知尺
籍有警則農皆兵耳郡人便之夏大雩公率諸
僚吏露禱爲詞誓神雨立澍已巳調嫡上庚午
晉秩右叅政

治兵自若會

詔舉邊材臺省

以公名首推者章二十上而公念劉夫人老表
請終養不報遂轉晉臬長未任再遷豫右轄其
秋卽以入賀歸里圖遂初志表未上而劉夫
人已前逝矣公柴毀如不欲生越三年爲今
皇帝改元之明年甲戌乃起補越藩尋拜御史
中丞鎮撫山西前鎮撫有心疾喜文法刻深里
中惡少年因而告訐逮繫纍纍諸善類重足立
公至乃下教凡前鎮撫所受詞皆勿聽卽民有
冤苦許再告晉大悅已又念晉轄三關爲通虜

要地巾車周覽自偏關至老牛灣延袤百五里
咸築亭堠亭相距百步許令刁斗易傳控弦可
及晉於是屹然金湯矣又明年三月移節雲中
雲中逼虜巢宗儀軍民雜處難治時代藩以信
用羣小戴罪公劾奏無道宜廢上念懿親特
令修省王被譴惶慙不能振諸宗益橫公表請
鈐束宗人以爲修省之實或謂公方彈糾而又
請加事權不矛盾乎公曰宗室以王敘爵無所
憚必生蕩心王方失職縮朒忽假以柄當厚自

澡雪以法令爲兢兢吾一舉而兩成之道耳議
上 上嘉納降 溫旨策勉王卒改行成賢王
諸宗亦逶逶奉法則公鼓舞之術也往宗祿屢
責逋有司有司不能行境外逋益多公請例京
邊餉嚴考成於是宗廩贍腹宗人益安雲中邊
垣久圯請修築跡三晉蓋制府蒲坂王公爲政
而公實綱紀之或過計以是生虜心公獨毅然
決策不搖羣喙凡所築餘五百里樓櫓斥堠相
望邊防益峻迄今賴焉戊寅晉貳樞筦已卯賜

節鉞控制雲中上谷二晉軍是時虜順義王俺
答耄矣無復躍馬引強意獨其子黃曾從子青
曾數桀驁爲邊患黃曾要撫賞歲增金縉以爲
常不得則擁騎剽掠公露布撤兵任其狂逞黃
曾計不遂始就約束終公之世白登不敢索一
縷青曾潛行幕南以射鴈爲名闌入獨石口傷
我戍卒邊吏莫敢誰何公以爲示弱非策表請
盡法以徇曾乃讐服頃之順義物故中國皆謂
邊釁且開虜亦以其王死中國不復煦沫訛言

蓬起羣情洶洶公惟布威德而待以忠信虜求
封爵如故黃酋死子檣酋剽而無禮過其父公
帥百騎出塞與訂盟時盛夏靈雨酋故稽延或
擯撫它事以嘗我公怒曰封事可一言定若數
日不決何也若受則封不受則不封再有曼言
吾立斬若矣酋卒俛首受封是役也虜酋始終
無畔意則公羈縻計深耳蓋俺答有外孫女曰
三孃子愛其色納之孃子實有智數俺酋帳下
虜屬焉而孃子自練精兵復萬計夷情嚮背半

係孃子夷俗父死子得妻其妾俺酋死孃子當
歸黃酋黃酋者老而病孃子意嫌之將別屬公
曰孃子握精兵別屬我封此老酋何用乃令人
往說孃子曰黃酋王汝不歸王而它屬王力能
斬汝且歸王則夫人天朝以夫人禮賞賚汝
不歸王一羣夷煩耳豈得冒毫毛之賜又說黃
酋曰汝不與孃子聚者夷中事未畢何以受封
於是黃酋急求孃子孃子逼利害不得已歸黃
酋黃酋死檜酋當嗣封聚孃子而檜酋業有諸

姬百數孃子懇不得專房則又難之公遣譯諭
檜酋曰孃子三世歸順汝能孃子聚則封汝不
亟聚孃子歸它人恐封別有屬也檜酋懇盡逐
諸姬悅孃子孃子得配王又專房則日夜焚香
祝公願得爲公死無所辭嗣後傾心中國卽夷
情有不順必曲爲居閒得其安帖乃已公以孃
子之賢聞於上封忠順夫人夷俗君長死以
所愛殉公曰順義華號葬宜用華禮爲請卹典
改其殉虜喜得厚葬而王左右愛幸得不死更

感恩次骨向中國甚於事虜王矣虜負戎馬足
懷禽獸心上世莫能制公所以牢籠羈馭如弄
嬰兒股掌上卽邊吏日伺公戲下者亦莫測其
要領從此邊郵晏然歲省餉額百四十五萬有
奇蓋至西征之役孃子猶使使叩轅門曰太師
勿怒孃子速令虜王歸巢不敢忘太師恩也公
蒞雲谷五年 廷推協理京營戎政 上命文
書官口傳鄭洛在邊鎮節省錢糧勞績素著如
何推京營寘在閒散其照舊總督語具吳門申

相國綸扉司草中中外秘莫知也又五年復推
前銜始得 命然公已積勩素加太子太保兵
部尚書矣公由總制還 朝朝士想望其丰采
一見嘖嘖曰鄭公虎頭燕頤不萬里封侯不止
也居亡何西海流虜火落赤等住牧莽刺捏工
兩川闌入洮河殺副將聲言犯臨鞏虜王椿酋
適西行火酋挾以爲重中外震恐 上命九卿
推轂重臣往經略之以公名上 上臨 便殿
語相國曰 朕觀是人 陛見聲音洪亮器局

若武將是能其任者遂拜公經略陝西甘固延寧及宣人山西七鎮戎馬仍兼攝三邊總督事會聖節在邇公宜同九列祝釐有詔急裝

母候公卽日 陛辭而西時 朝議甲乙紛如

聚訟有言虜勢猖獗須提兵十萬乃可橫行者有言檣酋爲達虜君長突騎雲集我兵積孱望風喙息不如以內帑五十萬恣經畧所爲要以和戎安邊爲上者統袴之子欲倖邊功以希爵賞或圖乾沒以潤私囊率假獻策從征之名以

千錄用長安貴人爲作曹丘者數以澤量公一切謝絕惟以庫部主政嶺南梁君遼東僉憲偏關萬公往參軍而公獨計以爲提兵數十萬良足快意餉安從出以金縉和虜宋事已誤豈容再誤昔後將軍至金城圖上方略臣車徒西入始敢決勝耳或勸公疾走臨洮解虜圍者公曰虜謀未合豈能十日居內地是行誅已退之虜非虜待吾兵而退也公前旌出居庸報虜退與所料無異然猶出入洮河殺掠人民畜產害未

已公由邊外耀武過陽和會制府泰安蕭公爲
諭檄解散之曰火落赤率真相台吉等悖逆內
犯 皇帝命出師殲厥渠魁其支屬穴處及西
行弗援者罔治漢過不先爾其圖之檄布虜衆
漸貳公乃選精銳西度榆林朔方抵臯蘭察兵
食多寡山川險阨問諸將吏方略自虜酋假道
扁都鎮羌要挾莊涼山丹扁都開市而邊吏從
之又虜羌合謀爲虜嚮道而邊吏弗問復爲建
寺青海以處族屬虜志益驕則洮河所由入耳

乃約諸將招募伙飛日椎牛饗之分遣宿將習
羌者喻意旨屬梁萬兩君東西招徠羌雖雜處
虜穴乎然數苦慘牢一見漢官威儀皆環拜泣
下內附者三十萬有奇願中馬易茶效命殺虜
以報公喜曰得諸羌用之以夷攻夷破之必矣
遂請絕假道禁搶番厚犒築堡以固羌心羌倚
我爲藩屏我借羌爲耳目羌心逾附虜勢逾孤
乃下令曰虜自北南徙者誅自南北徙者聽頃
之青抄數會果率部落南徙松虜闖鎮羌我師

出擊斬首八十餘級套中王子卜酋復擁衆西
來由水泉扁都入海輜重躑躅公曰是見吾守
不敢犯撤守虜必入伏兵夾擊可擒也秘授計
甘肅大將軍令戍卒佯退誘卜酋扞邊入三伏
俱發虜驚潰捕斬百餘級鹵獲衣畜萬數其莊
涼等鎮市賞復盡革虜王度不能抗乃還所掠
人畜謝過卜酋亦悔罪公遂移駐湟中崑力誅
火落赤檄諭羌部各取道進兵我軍由湟中渡
歸德扼河腦截其川海道路火真遂棄莽規永

酋亦棄海嶠虜王棄仰華寺逾野牛灣咸惴惴
震業顧火真雖宵遁乎然所遺兩川人畜尚多
公令河東大將軍縱擊之俘斬百五十餘名顆
鹵獲衣畜復萬數自是火真不敢南下牧馬虜
王一意歸巢唯唯願由川底川底者殊非虜便
實逼我趣而佯順我冀秋高馬肥卽請邊以內
行公曰是非虜所宜吾姑念爾歸願許爾其所
過堡落卽依違片晷踐一芻食一米吾必汝誅
虜唯唯東歸部落數十萬秋毫無犯亦足以明

經畧威令矣公以虜雖東猶慮遺種且梵剎巋然爲虜奧區計其出必再入也乃合兩河兵深入川海撽除無噍類列炬焚仰華收其經像而還而先是虜詐羗入西寧公計以羗擒虜虜盡被擒益大驚遣使謝公計縱之則見狎僂之則見讎乃以屬西寧將軍俾率健卒榜掠欲殺者三而馳赦之虜使歸告其主曰太師天威也以是虜王懇乞歸無敢衡命公乃條上備邊十二事一曰嚴借路以杜虜訐二曰急自治以整兵

將三曰鼓番族以固藩籬四曰扼川底以殺虜
勢五曰守歸德以肩重鎮六曰飭茶禁以困海
虜七曰明番路以絕交通八曰時鵬勦以消茶
毒九曰殲渠魁以正典刑十曰重首功以鼓健
鬪十一曰廣招降以散烏合十二曰收服屬以
示羈縻言言皆石畫十月班師十二月入白登
以積憊移病詔勿許若曰卿經略備涉艱危
今事畢東還朕心體念賜白金一鎰蟒衣一
襲酬勞勩卿其節慎醫藥以終朕命公乃強

起視事會虜王遣使求貢市公以在西不能囚
火酋督過使使以火酋亡匿爲解公曰火酋匿
矣史酋固在帳中縛來吾赦爾不者則削爵罷
貢使歸報卽日虜王繫史酋戲下待罪公謀於
制府蕭公懲而釋之史酋感畏馴擾如故史酋
者以屬夷居上谷靖胡四海治間最久捍外夷
有力焉逃入漠北且爲中行說公一言而生致
伏辜賢於十萬騎矣至是乃稍復虜王貢市其
賞準初封而濫觴之費裁革什五虜亦讐服亡

敢譁最後寧夏之變李氏行萬金結虜助逆虜
王叱去曰鄭太師生我我乃爲此卽太師呵讓
我死矣而公之策虜亦曰虜不助火酋乃助李
氏乎然後知公之威德遠也辛卯詔公還朝
復典禁兵而公素骭髒於當路罕所通謁竟中
謠詠倚齷其功凡所籍奏將吏汗馬勞率多議
格公歎曰洛不佞不能當執事者意無所逃罪
將吏冒霜雪犯白刃徼一級爵耳洛昧死疏名
而執事者皆絀其勞洛何面目見諸部曲乎投

劾乞骸骨章數十上詞益愾始得旨歸歸數
年而西師衄虜羗有力焉邊臣奏捷追叙公招
羗首功有曰守在四夷功高一代者有曰曲突
徙薪是宜優異者上報曰鄭洛收番有功其
遇缺起用所蔭子加錦衣指揮僉事世襲然後
公功始白公志益伸云公既歸而抗志冥鴻無
復出山想以前後所賜金虎第闢一園第左顏
之曰惠養蓋取疏氏惠養老臣意每晨夕逍遙
其中林木翳然有濠濮間想足跡於城府可數

臺使監司守令自公謁外不一見閉關卻客或
心知契舊枉干旄而過則欣然爲具鷄黍去亦
無所報謝歲時過從惟少年同學間里親知卽
田叟野父必盱衡遇之跪起扶掖如平等間與
話桑麻及民間疾苦竟日不倦聞世風弔靡則
慨然搔擗思所以挽其逝波誘掖後進必以先
輦典刑相勗勉惟絕口不言西征功所親或侈
言之但曰主上寵霧將士謀勇洛何力之有
焉於朝政亡所干涉然亦時有借筭策東西

事若符券。噉劉之亂。公曰。是橫者。不過數輩。餘悉脅從。且多反側。當事者直挺身入諭。以禍福卽片言可定。柰何。白大人而救火也。我師援朝鮮者。始有王京之捷。公曰。國威張矣。急振旅。毋再舉也。聞大將軍乘勝窮追。則曰。畫蛇添足。後必多事。亡何果有碧蹄之敗。倭求封貢。則曰。城下之盟。萬萬不可。今日惟宜議守。乘間乃可圖也。人以是服其遠識。云公敷歷中外垂四十年。未嘗以竿牘通津要。嘗言仕宦于進。猶處子失。

節有恥者不爲也總督時繫著邊伐而世廕未
及或言非資緣不可得公曰以資緣得是違天
也違天則天必厭而斂之禍其子孫吾不敢也
後上以執金吾世及公表辭不獲始拜命
邊鎮專征武弁得行用舍或以親識冒功級平
民至紆青紫公握兵符久未嘗以是假人嘗曰
爵賞朝廷公器安得以比私昵乎蒞官所至首
慎勾稽曰吾朝拜官而夕可代也總督嚴重支
費故無簿計公月要歲會如畏上官綜覈者後

去任所司迎合閱視欲於此中傳臯而不知尺籍具在米鹽亡漏其人愕然媿詘制府蕭公以是歎公蚤見也蓋公博大精明沉毅有器局而治務大體不責苛細嘗以小過笞從官會其人以病請假卽數日不樂其人病已來見然後色喜以軍法懲大臯意其人死矣後偶於稠人中見之不覺失聲曰若固無恙耶退而愉快曰用重典而人不死法恩具在吾與彼均無憾矣其慈仁平恕如此性至孝奉母劉夫人備極志養

其遷澤潞也次禹州而劉夫人病甚公徬徨籲
天請以身代劉夫人從室中呼曰若社稷身也
何自苦公趨前省問劉夫人曰吾見若跼中庭
聞若語也夫劉夫人臥床第安得見公戶外公
齋心密禱劉夫人安得聞公語人謂孝緒冥通
公殆有焉劉夫人物矣奉庶母孫如劉夫人孫
卒歸葬公執紼哀慟感動路人而以祔葬屬少
叅君曰孫全節保孤而王父忠臣也是宜祔以
慰王父心於是孫乃得祔居家嚴而有禮不冠

不見諸子孫有過不爲譙讓惟傍喻托諷或鬱鬱不樂埃其若訓乃進匕飭別剏廟祀以奉祖先立祊田百畝齋而致祭廟之傍作廡舍爲宗學以迪子姓設義倉以周乏絕庚子游饑出粟二千石賑其里人族百石諸生百石封內餽口者千八百石焉西師奏捷武安見夢盡以征西俸營武安廟城西而建藥王祠火神祠雩祈徼福與衆共之敦重故誼卽童年塾師猶執北面脯資餽饋不乏而知交死友聞計出涕罷宴遊

之歡者三閱月其內行惇備又如此公素強少疾至是病洵猶爾神王屬續之辰戒勿近婦人卽所幸姬亟請侍亦不得中夕忽謂諸子曰人言神出舍吾見吾神熒然參吾前是真我此委形非真我也已又謂侍者曰傳門者啓中門列吾儀衛吾乘張騫槎去矣言訖而化化之後鬚髮白者盡變而鬢入殮魄甚輕家養一鶴亦化去嗚呼公殆飄飄僊舉也哉公諱洛字禹秀別號範溪於書無不窺下筆數萬言立就議事起

草令掌史從旁手錄頃刻淋漓滿紙文好司馬
遷左氏詩古選俱大家而近體學杜者什七其
經世見巡蜀疏稿興都事宜撫晉條議雲中疏
稿修邊事宜總督奏議撫夷紀略禦虜俗言邊
計一覽經略奏議而手所刪訂有少保史鈔法
藏碎金鈔內典真詮大雄氏法語鈔李杜歌行
古塞下曲所著有恩綸冊永思錄陳情疏白賁
堂詩草塞下曲絕句百首諸書行世而文章簡
札未及剗刪藏於家元配陳氏封孺人加封淑

人繫贈一品夫人幼婉嫵有女操劉夫人聞而
委禽焉笄而歸公年十四人或以其少而婦也
而易之乃一品顧習爲婦治絲枲井曰酒漿無
不精鑿而篝燈熒熒以緝緝紈佐丙夜讀曰妾
敢先夫子休後夫子作也以故公益耑精學殖
無內顧公司李東海什九在外所以奉姑育子
惟一品是倚姑春秋高一品起居益肅臥病侍
醫藥惟謹滫髓必親調中榆必親滌口饘粥手
匡牀扶掖抑搔不休歎然時公方巡蜀絕不使

公知也課兒女食而教督臧獲嚴而恤樛木小
星之愛愛其所出不翅已出子侄標如子子標
之弟栗及栗之妹如標凡公所爲政於家爲德
於鄉若族則一品實陰佐之至爲諸生讓田中
鄉書郤饋爲御史劾權姦治兵矯上表請終養
諸種種奇節一品當之不色動且左右慫慂以
翼公于成也豈不筭幃男子哉公生以嘉靖庚
寅十一月六日卒于萬曆庚子十二月五日享
年七十有一一品生以嘉靖癸巳八月二日卒

以萬曆己卯九月廿日享年四十有七子五伯材萬曆甲戌進士山東右叅議備兵懷隆娶張蕎女封孺人加封宜人仲樸錦衣衛都指揮僉事娶西安守甕蕙女封恭人加封淑人叔棐官生娶山東憲副郭天祿女季棻丁酉舉人娶序班徐礪女皆一品出五檠官生娶吏科給事中劉道亨女黃出女四長適南光祿卿蔣遵箴一品出次適諸生高陞李出次許重慶守管學畏子潤次未許黃出孫男四延勲官生娶山西叅

政韋以誠女繼娶戶部員外郭可楨女材出延
烈聘進士陳萬策女延休聘諸生徐樞芳女裴
出延壽藥出孫女二一許南京戶部郎中甕幼
金子洵一未許裴出曾孫二爾基錦衣衛指揮
僉事應襲聘諸生陳居敬女爾隆未聘皆延勲
出先是巳卯之冬公葬一品婁山業志而銘之
後光祿蔣君相其地不吉請庚之新安三台公
有治命曰異時合窆其綴一品於狀末而竝祭
合葬則微上恩焉某是以合而狀之若夫章

懿揚幽勒之貞珉以俟信史

明奉直大夫南京工部營繕司員外郎

止菴方公行狀

代

自王文成氏倡絕學建東南旗鼓而其徒舞之最著者曰山陰王先生汝中錢塘錢先生洪甫兩先生設臯比都講環橋奕奕若吾鄉止菴方公其一也公卽名王氏學然實宗朱而衷陸象試邑長郡司馬冬官大夫鑿鑿表豎出入不悖于所聞晚而爲政於家準四禮行宗法脩枋田

里社駸駸乎洙閩遺矣其自陪京請急歸里里
居者八年爲萬曆乙巳春二月晦忽嬰末疾捐
館舍冢子藩幕君以其冬葬公同坂中塢山羨
中石未勒將乞言於當代作者而屬不佞某狀
其事以備采狀曰方公諱養時字以中號養吾
晚更止菴浙之遂安人也其先故汪姓系出越
王華第七子明十六世孫京白歛大坂徙開化
馬金五季時曰羅者自馬金徙遂安源岐傳十
一世孫振有女字同里方閨子通無子子其內

兄孟明之子曰思永遂襲方氏家銀峯思永有子三其伯子正凡數傳至嚮以詣闕訟族人湛湘冤脫其分成辟獲免一族世世德之嚮生倣倣生廷政廷政生奉政大夫亨公父也以公貴封長泰令加封肇慶丞稱奉政大夫配余宜人亦以公封繇孺人晉宜人夫婦齊德白首相莊舉二丈夫子長曰善次卽公公生而警穎異凡見少受易於余明經東陳令君勲咸器之弱冠補郡諸生彙試輒昇等負笈虎林棲雲居友四

方同志名益噪而奉政公磊落多奇節嘗割庾
產拊其兄之孤捐身拯同舟之溺余宜人以爲
陰德後宜顯其在孺子乎乃公自業博士時輒
恥佔坤志聖賢之學會宛陵周恪來令遂安倡
文成良知之旨公投贊獨先與聞其說而遂之
瀛山有宋詹儀之先生讀書臺其下爲方塘朱
晦翁源頭活水之咏卽其處也儀之與晦翁共
訂格致補遺傳往來論學以闢斯堂歲久圯弗
治公請於周令捐貲鳩工復書院而亭其塘顏

曰瀛山精舍中爲格致堂後爲三先生祠祠晦
翁儀之而社稷周令以寄畏壘之思羣弟子弦
誦其中語具錢王二先生記二先生故文成高
弟而周令北面焉時會講天真書院公擔簦趨
函丈受業印證宛陵之所論說昭若發矇矣遂
以其秋登賢書公不喜得雋而喜獲聆錢王緒
論更延王先生沂富春登瀛山坐格致堂舉朱
子晚年定論合文成奧旨參訂揚摧鐫之石相
與賡方塘詩而別蓋庚午冬十月也公旣不耑

爲公車業益講求理性經世之術學彌邃而試
輒齟齬計偕四上雙白在堂奉政公命之曰士
貴自樹有志者不問格吾老矣顧猶然蠕望脫
養不逮其若臯魚何庚辰謁選得閩之長泰令
甫下車法主藏吏乾沒三百金驅猾隸之不受
旣者百人公庭肅然已而定賦期革耗羨懸法
馬給由帖審權量平物價吏無所輕重市魁亡
所低昂邑毗便之月朔朝三老飭鄉約禁賭盜
戒諭諄諄旌其良者扶其不率者復嚴保甲法

什伍互相調察一田更守瓜寤而失衣被愬之
公公召里胥錄其素稱警跡者責捕偷不獲則
治警跡三日里胥持衣被來云得之積草間窮
治轉鞠則所稱警跡人也叩頭伏臯請更始諸
偷屏息形家主測學宮石崗之文星缺陷賓興
詘焉公爲捐贖醵登石封土崇麗譙其上以祀
文昌峻嶒突兀隆隆改觀掘地得古碑銘曰石
崗平四山明文星現賢才生宋景定元年識邑
爭詫以爲奇其秋登解額者五歷數試蟬聯不

絕有掄南宮魁者泰人士至今頌德云又邑故
隸漳晦翁昔守漳邑於是乎有祠會時宰廢天
下書院祠在甯中公奏記兩臺爭之彊曰先賢
有遺化粥祠非美名不得則請以官贖議遂格
復請復李延平祠新晦翁祠撤高東溪主祠其
鄉晉陳北溪方若水配祠典一新時論避之居
邑三年治理流聞其浚黃蠟永利陂疏復蓮池
掘陵渠爲耕夫世世利或比之西門鄴渠焉臺
薦婁騰以最封奉政公文林郎如公官母秩如

之乙酉秋稍遷端州丞劄陽江職山海千阪端
素稱盜藪奸商駕餘皇出沒亡常或負海而穴
公條上一號票以杜影射等六事仍舉長泰聯
鄉保約法飭各屬邑行之盜息民安撫民許恩
住城西其黨數百散處北津港控扼塞觀望實
懷貳心公立召恩曰若等旣就撫皆良民而自
異編民可乎籍其名于官烙其船稽出入復移
北津兵戍海口闢教場練水兵恩用讐伏間右
亦藉以安堵其署高涼時劇盜蔡邦良邦堅攻

剽聚落勢張甚支解招者手刃官兵十七人司
振者懾莫敢誰何公列其狀督府得密札謂高
涼在在皆兵不妨便宜行事遂撤捕兵給訓諭
令所親持示待以不死俾立功自贖良卽日束
身歸命械送督府磔而傳首山中孽黨悉解箠
庫吏阮紳盜帑金八百餘計無出公籍紳家得
其出入券疏名通衢令以銀贖券者免辟不則
寘諸理不十日而帑金悉還如數郎官山產異
石猾阼控取射利聚黨三百餘游徼撻捕卽獸

遁東西伏莫可蹤跡公遣一偵卒潛入山徧與
猾通得習知某某住某寮籍名密報縛渠魁就
卒質皆俛首無辭薄其罪檄諭解去澳夷樵採
十二人飄入北津徼卒鹵獲且冒首功公譯審
皆夷奴白督府釋之莫不咋舌輸心撫酋李茂
陳德樂陰蓄叛謀復聚羣不逞犯珠池督府檄
諸司征勦公督舟師分道夾擊五月而池平論
功奏績 聖書賜金五先後兩臺疏薦列上考
而奉政公之訃至矣奔歸母宜人繼逝擗踊幾

絕疆起襄大事以九月四日出祖而恩綸至
復以瓊海功賜金十一時艷稱侈爲盛事云壬
辰公除仍補端丞職守如故端人喜逾更生望
公如望歲而公亦以輕車熟路信下獲上思展
其所未竟設方略平亂婁建奇功窺池賊劉英
等往來剽商舶公潛師尾其後一鼓殲之孽黨
萬廷貴等嘯聚島嶼間公擒斬其酋戴隆林東
津李念齊復授秘計哨官胡良琮潛跡廷貴出
不意捕之械送幕府餘寇悉平當是時山海諸

寇出沒縱橫爲嶺南大梗公兩在事遄發遄撲
無使滋蔓其所授禪率秘策輒懸合機宜以故
往無不克諸所招附什倍斬馘而公又當六年
報政之期當事者業以專城待公矣丁酉擢南
繕部員外郎公之郎繕部也委權龍江瓦屑關
關主告緝龍江則竹木薪炭襟會之市積胥猾
僧或資緣爲奸窟商賈廢職公至則首湔除之
條八議上大司空咸報可一日酌期會以甦守
候二曰革包攬以杜侵費三曰權收納以省催

比四曰給號籌以稽私越五日嚴收放以防冒
破六曰酌商本以定批納七日嚴稽察以懲脫
漏八曰清冊籍以稽影射種種皆石畫惠商裕
國宿蠹爲之一清而公復矢冰蘖勤勾校吏胥
無所染指啓閉以時無論雨雪寒暑關上下無
滯宿者五方稱平如出一口長年賈客近集遠
歸不翅苑積而川決也暮年政成且有顯陟然
公業倦游願遂初服遂以戊戌請急歸栖瀛山
精舍招同志講學論文賡唱于喁裴徊天光雲

影間因自號止菴以見志慨古禮久湮銳意興復解橐中金百斤剏先祠捐庾田百畝祠鼻祖以下春秋合舉宗二十五世之主祔焉歲時伏臘聚族而饗之因以稍賙其貧者昏喪不能舉火者而司出納于才子弟又斥祠南隙地爲里社鄉厲壇各一讀法申誓掩骼埋胔間取冠昏喪祭之儀與家禮集禮合者刊定一書示族姓間里勉共遵守蓋不獨方氏規而已公素彊無恙旣得請歸卽堅臥不出忽以萬曆乙巳二月

二十九日奄然長逝距其生嘉靖丁酉九月三十日春秋六十有九元配章氏封孺人加封宜人婉孌有淑行息子三世教雲南布政司都事婦余世敏邑諸生婦毛世效太學生婦章並以政術文行世其家女月嫦字太學生王任儒孫男學祖學祐壽保長保孫女紫芝雲芝玉芝外孫太學生王家臣子姓蕃衍詵詵未艾所著有藏山書院志讀書漫興稿孚格公移復古維風錄行于世某生曰自新建學興左袒陸而弁髦

朱氏矣要之襲躬行者以貌襲神解者以言揆
以由中百不得一卽庭內不能無操戈況望門
而職者乎公之學雖自致知入然所在尸祝新
安不翅祖禰守官牧愛窮櫺拆衝樽俎居家敬
宗善俗力行古禮灼灼皆經世實用足爲道學
解嘲矣疇昔紅旗之夢尊朱赤幟兆在公平某
從諸昆後獲稱世講得藉手而狀公甚幸謹次
其事以竣信史

明勅封儒人劉母范氏行狀

代

都諫劉先生之失其母孺人范也毀幾不勝喪
越明年辛丑哀痛稍定乃克襄大事以三月壬
寅啓給事公之兆合窆焉而手行草屬其門人
某曰孤生也多疚藉母孺人以有今孤之身母
身也甫亂疹發甚厲幾死十歲頭誤觸風幾死
旣授室復患耳瘡甚殊不欲生時呼母分痛母
爲雨淚抑搔不去手凡廢餐寢者若而月壬午
入棘受觸仆地賴友人掖得不死十八年餘言
之母淚未嘗不簌簌下也蓋至大漸之辰孤痛

極而暈母臨飾巾猶瞪目問孤飯不頭復岑岑
不是孤以賴焉之軀始終累母而於母壯亡能
榮老亡能安病亡能起孤尚得比人乎哉所藉
以亡腐化者則惟惠徼吾子之一言且逞者業
壽母誅母知母莫子若吾子狀矣孤將藉手以
丐銘表於作者夫小子某則何能不腐母然知
先生之篤孝與母之懿行實稔也其又敢辭狀
曰孺人出霸間右父曰處士暉母曰媪李李息
女三孺人季也處士骭髀負節俠有弟曰亳州

守陽清修鯁介紀在州乘則處士實成之而州諸生劉惠直公某亦仗義喜施雅稱臭味莫逆時從杯酒間各指孕而盟昏也亡何李舉孺人惠直公之配宋亦舉給事公某兩家大喜如願復持牛酒交賀曰昏自此定矣蓋若天所定云孺人生而敏慧婉嫕有女操通孝經女誠諸義事兩姊甚謹處士絕憐愛之笄而歸給事公年十八會惠直公中挫產室如懸磬孺人晝夜操作而前爲伯姒先度雍孫不給則脫簪珥佐之

蓋夫婦相對藜藿也而堂上之甘毳充豆矣其
庀家秉能削饒爲嗇勵逸以銳管蒧蕤之鑰藉
撝臧獲畢盡其才力而相給事公學篝燈熒熒
以緝繡佐丙夜讀曰妾安敢後夫子與先夫子
宿也以故給事公得崙精學殖無內顧旋補博
士弟子以經術教授里中得脯修之美授孺人
孺人不爲私置壹以共尊章菽水而課耕織井
曰諸麓織男女不易職昕夕不棄畧尊若章益
安孺人養每刺刺語人新婦賢新婦賢其喪嫜

宋悉捐橐中裝庀具亡少憾至伏臘諱晨泫然涕交於頤一時五宗九屬具曰劉得孝婦卽給事公亦云微夫人吾不任子也給事公旣婁不得志於公車乃去而明農而日課伯子及劉先生學孺人以寡佐之亡所假貸時討而訓之曰而父之竟之志以屬二兒兒亦不易步伯子學成鎮諸生無辛中道妖而劉先生遂以乙酉領順天薦第丙戌進士改庶吉士讀中秘書戊子解館授刑科給事中奉孺人就京邸養人或謂

先生才堪史局不宜移省垣者孺人曰留而史官出而諫官等天子之侍從臣以朝夕啓沃上心者也夫史官之效緩而諫官速若柰何愛其緩者其勉之盡忠報國勿卹其它庚寅奏最封給事公如其官而孺人之封秩亦如之先生節翟禕以進一御而罷曰吾豈學田舍嫗小得意卽沾沾爲富貴容者簪荆襦布佐給事公力農如初辛卯先生典試東魯孺人拳拳訓以公忠且曰簡書至嚴勿以家爲念吾聞齊魯之國斌

斌文學庶幾得七十子者報命天子附以人事
君之義老婦與有光矣先生祇役竣事以得士
稱丁酉 三殿災 詔補諸言官需次闕下者
先生以公除首拜吏垣孺人復謂先生 聖恩
高厚其直陳闕失無諱戊戌佐大察分校南宮
仍以公忠訓有加焉先生奉命唯唯遂極言

人主得失及宗社安危大計若 朝講 郊廟
冊立冠昏系疏力諍無所避又時詣政府促之
伏闕而政府阿上意間有所變亂雜進先生持

之強至令人啖以後效林以叵測屹不爲動當
是時先生直聲震天下然竟用是忤當路干雷
霆卒至貶謫而後孺人喜可知也曰爲諫官當
如是矣初先生之謫也怡然就道矣而念孺人
耄且慮行遠傷親意以爲大戚孺人正色曰而
豈吾有耶齷齪兒女子何居昔劉安世之母曰
諫官爲天子諍臣當以身殉國正得辜放逐無
問近遠吾當從汝所之卽遠竄何恨先生乃扶
輿出國門神王意適也中途中痰疾寢劇醫望

之却走先生徬徨顓天而禱百神祈減算以代
始以蒲牀徐行及方城而蘇抵舍則能言語矣
又三年而七節目進有加矣郡邑大夫以逮親
知里閭海內英碩共舉八十之觴卽某亦從二
三君子後鞠脰修酌者之敬僉謂大災不死可
期願難老乃一嬰痢而積飭以坊悲夫坊之日
爲萬曆庚子八月念九距其懸輓爲正德庚辰
三月初一週甲子者又二十一年子女凡十一
乳育者僅伯若仲伯諸生爲霖娶趙氏仲卽劉

先生名爲楫吏科都給事中奉 旨欽降遼東

苑馬寺主簿娶李氏贈孺人繼娶尚氏封孺人
孫男女伯出者長清歿顯祖娶省祭官苗選女
繼娶省祭官鞏思謙女壽祖娶諸生李洞然女
女適諸生楊檟子諸生一元適太醫院吏目李
默然子啓常仲出者光祖娶吏部考功司主事
王君樂善女胤祖聘山西兵備副使楊君應中
女弘祖未聘女適太學生樊民傑子諸生爾繼
許字漳德知府馮君盛明子某二未許曾孫男

臯聘諸生李致敬女顯祖出駿光祖出並爲孺
人孫曾男若女孺人儉勤慈仁蓋其天性工鍼
繡紉刺諸伎然不以一縷施體治食味甚鮮麗
然不以匕勺入口鶉衣糲餐殽于中人而周兩
姊及姑以迨疏屬外氏異姓絕遠之家取若外
藏以子覃封徼有恩命貴矣而戢身機杼庀劉
先生邸中資斧婚嫁伯子遺孤無不自其十指
出聞義慷慨有烈丈夫風而遇俠家齟齬稱百
忍以慰給事公犯而不校雖操內政然米鹽瑣

細非關白夫子莫敢顯探其笥不私一錢與給
事公白首相莊坳而毀瘠稱未亡人者八年啣
哀茹素如一日蓋女德婦順壺範母儀孺人殆
兼而有焉至不愛其貲以成夫於孝不卹其膚
以成子於忠則喆媛猶或難之列諸女宗稱桓
孟妻公父文伯鄭善果母矣此某所爲聞諸劉
先生者如此謹手掇其槩備采擇焉若夫有煒
彤管勒之貞珉以垂永永則有鉅公之言在

千頃齋初集卷之二十五

汝南黃居中明立父著

文部

傳

史母黃孺人貞節傳

詩美共姜矢死而儀兩髦也則東宮妃也秦賓
巴婦清以不見侵犯也其家故不訾也夫擁財
爲衛倚子爲天垂瑜珥而稱嫠德者多有之乃
若委巷之姿間關瘁瘠忍死立孤綫閤攸繫方

諸沃土思義蓋其難焉作黃貞節傳

黃貞節者家義烈季姬也笄而字史應魁以紉
紉佐魁學捐珥修餉不乏絕色養翁媪翁媪驩
之歲時奉賓祭惟謹魁補文學掌故員益攻苦
下帷不勝欲得瘵而劇貞節徬徨手湯藥減食
籲天祈以身代竟弗起時貞節年二十八絕粒
日念死三就雉經介妣三解之介亦歿也泣語
貞節曰老姑未盡之年伯氏無祿之祀壹以累
丘嫂嫂安得死夫生固有賢於死者爲生者生

爲死者亦生氏有二孤其一以後伯伯氏無子而有子血食在焉眎匹婦之溝瀆遠矣貞節於是乎始粒朝於廟請於姑聚族而議子介奴之孤於始孩而兩嫠翼之煢煢相依形影獨吊啓戶則奉婦饑局戶則課女紅自始髫以迄皓首垢衣蓬髮口不挂簾外事卽臧獲罕覩其面者家故四壁立重遭閔凶懸磬益甚餅無粟突無烟三餐不能一飽貞節窮日夜拮据不遺餘力紡紉紉綴鬻升斗給食與姑兒併命卽朝虞夕

孫夕虞朝雍備諸織儉瘠苦狀然終不以缺姑
養生具鮮灑歿庀槨殮如禮間拊孤而號曰天
乎天乎史氏祀危若綴旒惟茲三尺孤惟天所
授所不鳩桑烏舖以孤亢若宗者異時何以下
報九京於是乎孤始讀則操機杼侑之讀已輟
讀而就賈復操機杼侑之賈孤舞勺而弁爲孤
逆婦吾宗飾禽篚采凡百經費靡不自其十指
出者今孤卒以其家享母二母若一歲以珍膳
復陶進貞節却不御曰未亡人眎息人間其忍

背夫子而安孤一日養也蓋冰蘖至性老而彌
堅何論女懷清列諸柏舟自靖不殊而荼蓼備
嘗猶或過之至康而家造續一縷于千鈞以擬
下宮之夫人則趙客矣此之爲生顧不賢於死
哉藉令貞節當時母從頌而死以殉名烈矣若
敖之鬼不其餒而此所云從一存孤而待有終
者也孤名章能介奴姓許氏

外史氏曰歲戊午島寇薄安平余族祖仰以諸
生倡義帥衆禦賊死之鎮賴以全

詔贈州

司馬則所旌義烈而貞節父也父以烈殉國女以節殉家臣道妻道一也死存城生存祀亦各信其志乎許嫠白首同心章能以所後母顯名何史之多賢殆天所以報貞節也余故書其門曰節孝而傳其事以風焉

沙村吏隱傳

沙村吏隱者莆金墩黃利濟也世居沙堤嘗一爲英
德薄自免歸稱沙村吏隱云父曰臨高令必大母曰
周媪舉五丈夫子其季爲利濟生而岐嶷有遠志嘗
從其兄諫議謙蘇州倅議受毛氏經不成去攻古文
辭聲詩以詩鳴

肅皇帝朝

廟工興有

詔得輸金拜爵佐司空乏客以風臨高公名
之前曰孺子家世簪紱奈何老褐寬博耶而諫議蘇
州亦從吏其行則從選人得粵之英德薄爲簿攝令

餘半載用一切拊循法邑大治邑之人無不令奉簿
者每出則呼髯公來髯公來始公視邑時邑猾胥謂
公少季遊冶心易之則欲傲公以其所不知而不能
已又驚詫以爲老吏不如也邑有譌火公散髮仰天
而號爲邑萌請命言出口而雨澍得不災桀黠卓文
昌者嘯聚千百輩爲邑患公計縲其愛妾招撫之文
昌蒲伏稱死罪唯使君生我公爲奏記幕府條生死
文昌利害狀甚哲而昌立受撫矣則夜橐其三百金
以謝公麾金籍之學宮邑爲賦郤金頌一時臺司褒

章慰勞治行隆隆起然公意有所不足曰令吾以七
尺軀而老坐矮屋乎令吾纖趨曲踦候道旁貴人塵
乎吾歸吾歸耳田足耕圃足稼下澤款段足怡老胡
不歸蓋歸而割祿羨之入營菟裘蓄名畫法書古彝
鼎罇罍其中客至出傳翫以爲樂又其半則以急貧
宗突無烟者析無襦者簞無以室坳無以喪者咸倚
若外府凡十餘家而其花沙堤先祠捐橐佐之眎畚
耒不休櫛沐任俠好行義其天性也少耽書至老不
輟吾伊詩好杜陵文好韓昌黎柳河東間旁及稗史

九流而尤精於形家一日喜月峰山之勝卜首丘焉
中構三層臺樹奇卉惟木環之春夏之交一卮一盃
携故老逍遙其巔倦則枕木石齁齁眠忽聽松濤聲
狂呼絕倒以爲詩腸鼓吹浮白而歌歌益豪飲益劇
飲可七八斗而醉二三輒弄酒罵其坐客或子姓然
無它端客子姓以此愈益附公逮余造公樹惠堂公
時時出酒觴之客歲歸自燕會公中酒病未已居無
何而從者以公之訃至矣蓋傷于酒也從者又言公
易簀時不死女子手索筆自輓有正氣駕虹霓之句

噫如公真巖巖正氣已公偉顏修軀美鬚髯故人稱
揖公其詩膾炙人口者爲萬里晴雲橫素練半空飛
雨駕銀橋人或稱黃半空云諱誨利濟其字居中曰
余家系出金墩其於公蓋惠連康樂也時把臂爲忘
年交雁甚又辱與公之愛孫履康者遊文名俠氣稱
竹林大小阮故知公特詳夫公邑判薄耳一籲天而
雨立澍此以跡退彗反風其善言異政何如也而麾
暮夜金不入囊庶幾有還珠却硯之遺致焉史稱于
門之結駟楊庭之啣鱸並以廉平吏子孫世食其報

是在履康乎履康博古負偶聲方修千秋之業未見
其止嗚呼是可以不朽公矣

千頃齋初集卷之二十六

汝南黃居中明立父著

文部

誄

明故中大夫江右行省參知情符蔡公

誄

萬曆壬子秋七月江右行省參知蔡公以齋
捧北上行次方城之葉縣冒暑中惡暴隕于車
春秋四十有九嗚呼哀哉公世家晉江之龜湖

里高曾而下皆力田不住至公始用經術顯第
戊戌進士郎度支督吳餉出守雲間擢江右治
兵使者改視學政移令官所至愛利居富去思
而自御儉泊一粟一絲不以旁擾屬邑其於士
大夫容接造請咨地方利病語不及私人亦亡
敢以私溷公者蓋終公在事庭絕筐篚囊如槁
葉瀕行至不能治裝卽非意望公者欲伺公以
其隙終莫得而雌黃嗚呼是可以觀公矣陳徵
君碑公謂公氣局端凝辭令簡確張弛甘苦多

有妙裁而獨拈重之一字雅得公神情相近吁
知言哉公旣卒訃聞兩邦兩邦之人哭者逾月
靈輜所過輟肆罷舂矧余小子以文學末隸夙
受公知其忍聞山陽之笛鼓伯牙之琴也且禮
賤不誅貴余才劣位卑惡用蕪言累其芳烈所
惜者公之壯猶偉度秩不台司年不及艾斷魂
逆旅畢命窮途以德以類靡得而相民之無祿
殲我國琛敢揚懿於旗旒用攄哀于毫素詞曰
遙遙華胄出自宗周濟陽衍派汝水分流委人

于泉世隱弗燿食力耕畝信硯不究厥考重積
因壘作基樹有秋實未及饗之公起孤生如泉
初滴澹汙澄渟蓄極而出爰自黌校漱潤擷芳
文成斧藻筆吐琳琅乃擢賢科乃奏上第吳鉤
始礪越砥以礪棘曹試政粉署含香入司戶版
出饋吳饗庚癸無呼料量惟當萬井回春三軍
挾纊壯哉松郡阻海襟江賦繁牘冗風濠習龐
帝睠東南妙簡良牧公由郎潛一麾剖竹恭身
約下朱絃素絲省拈則釋張弛惟宜松俗訛囂

公鎮以靜莠言不入刑清事省松俗浮佻公鎮
以沉不隨不激莫窺淺深松俗汰奢公鎮以節
食不力珍衣不重纈松俗善幻公鎮以誠推赤
洞裏小大必情游刃恢恢批郤導窾猾吏負霜
彫黎解瘡愛僚恤屬前挽後推同公舉僕逢人
說斯或倅而守或丞而令吏戴鼇山人稱水鏡
章相急士以禮爲羅陽矯屏跡械櫟興歌干旄
浚都促鄰溫洽政俗咨諏弗狎于滌凡公治理
破雕爲觚不令喜怒無得親疎四載雲間杲杲

出日男畝婦桑歲無厲疾量移江臬復提士衡
詰戎校莠武緯文經左行右文謝華啓秀植彼
嘉禾芟其稂莠螟祝羸肖表直景從如泥在范
如金在鎔桃李門牆圭璋廊廟藉甚人倫衡平
鑑照乃參省政保釐湖東澤有歸鴈村無吠阮
視事甫朞旋奉嵩祝畏此簡書不遑信宿六
月于邁大火修途軒帷焚灼僕夫告痛肅肅宵
征熾燎附體虐燄中人暴終旅邸手足誰啓米
貝誰含魂搖斗北魄散天南嗚呼哀哉公之風

儀金相玉質公之器宇瀟淪嶽立施未展抱德
不享年壽徵福相胡謬不然嗚呼哀哉廣柳南
來白日慘淡懷我士民五內震撼烏桓隕鄧襄
峴失羊輟市巷哭劈面摧傷嗚呼哀哉余昔從
公遇以國士弱羽培風感恩知己一朝承諱悔
余素襟溘焉長往莫酬賞音嗚呼哀哉憶昨杪
秋偶披薦牘不見公名展轉反覆有客言狀驚
悸移時真耶夢耶懍怛然疑一涕無從三號若
失欲賦太招幾爲閣筆嗚呼哀哉蘋諸未豎有

母尸饗囊如秋葉產不及中水棄詒家脂膏是
操廉吏可爲惡知天道年慳半百名已千秋試
觀夷跼孰短孰修嗚呼哀哉公澤在吳公神在
楚兩地甘棠家尸戶俎人頽公者僅得其膚重
之一字庶幾情符余於徵君文則不逮所不朽
公惟寸心在嗚呼哀哉

劉母贈孺人王氏誄

代

贈孺人王者封文林郎劉公之配而
司諫君之母也婉孌有女操年十六

歸封公旦夜操作奉尊章惟謹無諭
甘膳卽醯醢并白諸米鹽靡不自其
十指出嘗手兩桶水給雍孫數十口
至勞苦矣抵暮猶爲封公製一衾木
其拮据勤內多類此以嘉靖己酉七
月七日從封公社村農行淚墜井死
後四十年子司諫君奏安陽最贈母
有今稱司諫君哀聖善之劬勞痛柅
倦之永絕旣祠母社村而享其井墓

矣又以狀屬其通家子某追爲之誄
在禮誄不及聞惟而死三不弔者曰
畏壓溺母之死死孝也亦安在其溺
之不弔而聞德之不外見也余亦有
母棄余蘋諸中余捉筆時淚涔涔下
矣誄曰

濯濯孺人婉婉雍肅教稟公官化始南國結褵
弱閨宜其家室勞宣沼沚好諧琴瑟賓饁如冀
齊案比孟以儉佐勤以順爲正色養尊章希鞶

庀鮮鹿挽鮑車鯉躍姜泉雍孫十口靡朝伊夕
出采蘋繁處麗締綌手兩筒水製一衿衣思媚
諸姑遑恤我肌姑曰勞止汔可少息豈不懷安
提甕嬪職胡爲獨行失足坎井綆短汲長而罹
斯警妯娌排側翁媼涕泗夫傷喪淑家悼隕芘
慈烏失哺啞啞哀音行人酸鼻宗黨摧心夜臺
重扇娥月永蝕春暉莫酬笑泉罔極子之能仕
移孝作忠馳榮榆翟譽命渥隆旣最鄴令載入
省垣矢志龍比伏蒲叩關

朝有直臣家稱令子歸美所生慶流女史瞻彼
松楸瞻茲風木構祠社村作亭并幕庾述母行
言囑其友俾操觚翰爰圖不朽小人有父棄余
襁褓小人有母亦背中道陟岵興哀循陔增慕
若母吾母淚盈旃素稱妻則桓方婦則萊斯人
斯呢貞姜漸臺何以誄之曰孝曰敬有煒彤管
紀之家乘